

Representation del Union Mundial pro Interlingua

Conditiones, deberes e derechos del organisationes national – e del representantes individual – que representa le UMI

1 – Introduction

Le UMI es interessate in esser si vastemente e si ben representate como possibile, i.e. per fidel colaboradores active in cata pais – como organisationes national o, temporariamente, representantes singule. Le sectiones (organisationes o representantes) national labora in le nomine del UMI. Le presentia in multe nationes es un necessitate pro un lingua international. Le Consilio Executive del UMI debe assecurar que le appunctate representantes national labora activemente pro interlingua e es efficace in le promotion de interlingua.

2– Sectiones

Un section del UMI debe esser recognoscite con le consentimento del Consilio Executive del UMI. Sectiones debe ager secundo le valores e methodos fundamental del UMI e sequer le planos de labor que es elaborate per le UMI episodicamente.

Pro esser recognoscite, le section debe:

- ante su recognition haber demonstrate su capabilitate de organiser e mantener activitates basic del UMI como detaliante in le prime puncto del obligationes ci-infra
- inviar su statutos al Consilio Executive del UMI pro approbation
- pagar le quotisation annual como determinate per le UMI

Un section national, recognoscite per le UMI, labora pro promover e realisar le vision e mission del UMI. Le scopo del section es coordinar le labor e consolidar su organisation national.

Pro un periodo provisorio de 12 menses, le Consilio Executive del UMI pote appunctar representantes (= individuos) in pais, ubi ancora non ha essite establite organisationes national recognoscite per UMI. Le prime scopo del representante debe esser crear un section in su pais.

3 – Obligationes

Le section national recognoscite per UMI debe:

- functionar como puncto de contacto pro le publico e le membros, como le representation del UMI, assi representante le interesses de iste organisation per laborar pro le diffusion active de interlingua in iste area geographic. Isto require un nucleo de al minus tres personas, qui pote colaborar.
- assecurar que nove interessatos pote trovar le organisation e obtener contacto (per catalogos telephonic national/regional/local, Internet, etc.).
- haber le tempore pro dar informationes e responder a interessatos, qui demanda information. I.e. responder a litteras, telephonatas etc. in modo incoragiante e positive, assi dante al interessato(s) le inclination a apprender e laborar con interlingua. Responsas debe esser facite si rapidamente como possibile.
- procurar a interessatos material informative de interlingua in le lingua(s) national – e eventual-

mente in interlingua (publicate per le UMI).

- mantener un cartotheca de adresses de interessatos con nomines, adresses e altere datos importante.
- informar le administration del UMI super membros e abonatos al magazin official del UMI, assi que illes recipe le materiales pro le quales illes ha pagate.
- esser le mediator de abonamentos e/o membrato del UMI, i.e. tener le lista de membros/abonatos e moneta e transferer los al administration.
- laborar pro crear un [ver] organisation national effective e active, assi demonstrante le seriositate de interlingua como medio de communication international.
- essayar establir contactos con universitates e scholas (pro poner materiales informative super interlingua in locos strategic, placards de interlingua, offerer discursos super interlingua in le classes etc.)
- mantener contacto con le pressa pro informar super importante activitates e eventos de interlingua, litteras al jornales etc.

4 – Duo membros al Consilio General

Cata section recognoscite per le UMI appuncta duo membros (un consiliero e un vice-consiliero) al Consilio General pro un periodo de duo annos, secundo le statutos del UMI.

5 – Reporto annual al UMI

Al minus un vice per anno le sectiones de interlingua debe reportar super lor activitates al Consilio Executive del UMI – in practica per inviar al secretario general del UMI un reporto descriptivo de iniciativas e activitates pro promover interlingua. Sur base del reportos, le secretario general del UMI documenta al Consilio Executive e al Consilio General super le progressos pro diffunder interlingua e le cognoscentia al lingua. Le reportos anque functiona como un catalogo de inspiration e assi debe esser assatis concrete.

Factos del Union Mundial pro Interlingua

Le Union Mundial pro Interlingua (UMI) es un institution pro cooperation international concernente interlingua, le lingua international publicate in 1951 per le International Auxiliary Language Association (IALA).

Le UMI esseva fundate le 28 de julio 1955 in Tours, Francia.

Le UMI age como un foro pro le function de facilitar le contacto, communication e collaboration inter le independente associationes, organisationes, individuos e interpresas regional. Le servicios del UMI es dunque variabile secundo circumstantias e possibilitates actual, e secundo lo que eveni sur plano regional. Le UMI es neutral in questiones religiose, politic e plus generalmente sensibile.

Le responsabilitate del functiones quotidian del UMI es in le manos de un Consilio Executive autonome con validitate de decisiones per simple majoritate de votos. Le strategia e labor al longe lineas es organisate per le Consilio General, cuje membros es appunctate per le organisationes national de interlingua.

Le Consilio Executive consiste de un presidente, un secretario general, un vice-secretario, un administrator, un aranea (redactor de Internet) e le redactor del magazin official. Le secretario general dirige le affaires currente del UMI e pote delegar cargas specific a assistentes.

Le UMI publica su magazin official, Panorama in interlingua, mantene un servicio de libros que forni litteratura in interlingua e rende disponibile diverse materiales informative e documentative super interlingua, primarimente per su presentia in Internet al adresse www.interlingua.com.

Iste documento es un annexo al “Statutos del Union Mundial pro Interlingua”

© 2010 Union Mundial pro Interlingua

Data : le 15e de maio 2010